

四庫全書

集部

欽定四庫全書

集部

篁墩文集卷六十三

詳校官編修_臣李堯棟

中書_臣劉源傳覆勘

總校官進士_臣朱 鈐

校對官監丞_臣張曾炳

謄錄監生_臣王思涵

欽定四庫全書

篁墩文集卷六十三

明程敏政撰

詩

古鏡行

何代青銅沒深土野人得自漳河許
蘚花半蝕未經磨
云是朱砂水銀古暗中忽有光射人
歷年想過漢與秦
背刻蛟螭雜鸞雀製樣不似菱花新
良朋寄贈來千里
坐客摩挲驚且喜共言舊物真是奇
拂拭還收錦囊裏

千金有價遇爾難曉
不許窺團團留取他年奉明主
坐使奸諛心膽寒

侯門怨

彰武伯女嫁為保定侯夫人年十七而死侯每與
客言及之淒然不勝客多為輓章貽之予亦為賦
侯門怨一首洩侯之悲

綺窓日暮愁雲結
寶鴨香銷紫檀屑
美人一去不復還
恨滿空林聽鴉鳩
金盤蠟燭半成灰
羅幌凝塵慘不開

王孫夜夜愁多夢疑有芳魂落鏡臺捲簾忽見孤飛燕
白日光陰疾如箭墳頭應長素馨花長對春風寄幽怨

題楊補之松檜圖

五松已受秦封辱六檜復被秦名污
參天直幹尚如此二雛已滅隨煙蕪
大夫偽號若芻狗處士雄心射牛斗
眼前便覺風雨來耳畔疑聞螭龍吼
良工此圖筆意精王孫一購千金輕
恨無大手如子美為賦成都古栢行
秦嘗封松為五大夫至宋季有永嘉處士胡裒者憤

秦檜之奸題其堂曰六檜蓋以六隱戮字也夫松檜
昔人以比端人正士而為二秦所污讟甚久僕因淮
人趙瑜家藏楊補之所繪圖輒為下一轉語

六月五日雨後早朝偶然作

夜來一尺雨汨沒西家牆不知早已霽但覺天蒼涼獨
行御溝畔流水聲泱泱仰視河漢間星斗爛輝光好風
吹葦衣毛髮森秋霜渺然鷗夷子扁舟泛江鄉又若萬
里鴻凌厲青雲翔人生貴適意此境安可常遙遙禁中

鼓隱隱夜未央下馬一憩息旭日升東方

義軒遺誨

編修師古
曾祖也

莆中有高人乃是太丘孫當其易簣時神氣了不昏治
命五十六懇懇皆名言宿草經幾年手澤今尚存我時
再拜觀長恨隔九原鄙哉鄴中子香履留私恩亦有汴
京相苦欲為緇髡平生竟何如此道不復論掩卷三嘆
息彷彿來生魂

齋居次韻世賞廷言

多才幾宿共齋誠玉署三回見月生紀盛又傳新得句
懷人空讀舊題名幽花小埭春光淺古木迴廊夜氣清
只恐御壇高處冷寢幃通夕未忘情

立春南郊送駕次韻亨父

虎符清曉發千牛黃道乘春出翠旂遠陋漢儀祠泰畤
早聞周樂奏崇邱風回禮殿鈴聲雜月上行宮扇影稠
共喜一宵陰色淨帝心元自與天遊

前日親郊看卜牛天門此夕駐龍旂齋居散吏瞻宸扆

扈蹕才人識帝丘
楓陞漏隨春日轉
竹宮燈雜夜星稠
禮成共喜沾周宴
何必驚心數宦遊

迎駕次韻亨父

一聲清蹕下郊壇
閭闔齊開敞玉闌
十二鑾鈴陳路馬
三千犀甲擁材官
鑪煙散綵凝香霧
扇影屯雲護淺寒
最是詞臣偏近輦
龍顏春色有餘懽

次韻原博賓之舜咨鳴治賜宴聯句

一派鈞韶合內筵
叨陪還厠玉堂仙
虎賁隊擁戈三百

鶴醞材高斗十千鎬邑風雲春燕喜堯階簪紱曉蟬聯
詞林四度霑嘉會鬢壓宮花憶少年

曉殿晴光覆四筵坐中人是謫來仙鑾迴閣道旌幢半
騎列句陳甲冑千棧樸願歌周代雅柏梁誰續漢庭聯
龍顏共喜春先上盱食憂勤記往年

袞衣親押慶成筵步輦乘春下集仙尚食緩傳盃數九
教坊爭出舞羣千晴薰御燠虹光動花覆宮袍獸錦聯
席上忽看雲綉彩從龍佳氣入新年

黃幄中分列御筵捧觴新曲度遊仙漏聲晝下銅龍五
仗影春回玉馬千白雪調煩詞客和紅雲班許近臣聯
不知秦嶽登壇處石檢重封是幾年

題畫

黃鳥飛飛綠樹低望中疑是上林西君王不受珍禽獻
一任空山自在啼

送李立之太常先生再赴南京

南國舊衣冠重遊興未闌文章周柱史禮樂漢祠官臺

閣掄材久郊亭話別難直應行色好梅柳遍江干
又送容臺去分司識故宮一尊留夕照雙珮下春空地
迴燕山隔冰消潞水通臨風思無限雲起暮江東

與廉伯世賢同至月河寺

因餞懋衡天
瑞連日至此

秋風吹雨淨飛埃十日東城兩度來繞院綠陰留客住
一亭紅艷對僧開芙蓉磧側觀瀾去苜蓿園西問稼回
有約明朝更攜手望雲同上雨花臺

過觀音寺和壁上舊日留題

勝地曾容半榻分當時不厭往來勤風塵尚識門前路
歲月驚看壁上文舊屋雕梁空燕壘古原青草見羊羣
西風不盡登樓興宦況蕭然薄似雲

元日壽董都督

旌節初離海上營喜從元日慶長生函關氣逐東風到
壘壁星連北斗明射虎不憂雙臂弱據鞍寧許一身輕
侯門最得春光早滿進椒花酒數行

分得荷蕩香風為周民表評事賦先瑩十景

一川雲錦為誰栽
香觸繁陰掃不開
依約似隨菱唱散
飄揚還近藕船來
青房雨歇遊魚上
翠葆風回宿鷺猜
極目感慈山下路
水花空對夕陽臺

題倪雲林小景

平生最愛雲林子
雅澹高情非畫史
偶然落筆自可人
不藉丹青布生紙
石田茅屋誰所營
疎篁老木搖春聲
輕綃半幅不盈咫
十里溪山無限情
臨風恍在西湖裏
只欠雙橈蕩湖水
晚潮初落少人行
菱唱依稀月中起

雲林老去今幾年風物蕭蕭似眼前
焚香閉閣無塵事願借山堂一榻眠

黃鶴山樵山水為楊考功宗器題

黃鶴山樵已仙去風采惟留畫中趣
幾回把玩欲招呼海闊天高不知處
但見一亭臨大河遠峯對面如青螺
孤洲水花晚色淨疎林落葉秋聲多
少年我憶遊江漢好山最喜推篷看
邇來寄足塵海中夢魂長到黃蘆岸
考功家近七閩山雅懷亦似水雲閒
題詩不盡蓴鱸興

何日相期解綬還

偶作寄王用賓太守

侯門不肯禮儒生
年少元戎更不情
此際賀蘭山下路
西風落日檻車行

偶成

丁香枝上葉初繁
漸覺疎陰過短垣
睡起不知初日午
畫簾風動雀聲喧

送克儉克寬弟省覲南京

江流不盡弟兄情此日那堪送汝行一片離魂收不住
夜來先到石頭城

二月城南草似煙二郎齊上木蘭船江行記取雲飛處
正是愁人白晝眠

楊柳青青葉尚稀贈行空有淚沾衣他時何處添離恨
水國秋風一鴈飛

寧國蔣氏山居四景

竹屋書巢

草玄何處結簷楹一塢深深竹數莖子夜天風來谷口
吾伊聲雜翠鸞聲

梅溪釣艇

雙槳悠悠出岸沙釣魚人住水西涯隔溪殘雪春猶淺
時見寒梅一樹花

丹厓錯薪

紅葉紛紛蔽草萊不辭提斧斲蒼苔斷厓斜日無人到
時聽樵歌出磎來

綠野腴田

茅屋山頭布谷鳴
老人忙起課農耕
不知門外春多少
稻穎青青一望平

苦熱與汪汝溫露坐樹下悵然有懷

赤日行天中
歟若飛火輪
炎光一迴薄
勃勃來蒸人
山雲慘不興
池水枯無津
花枝半憔悴
物色多酸辛
羈懷苦不釋
奈此未明辰
虛堂敞前楹
覓寂無四隣
古槐蔭庭除
掃地鋪藤茵
冷然生細爽
拂拂清我神
絲桐一揮

手岸此華陽巾玄蟬起長號微風動青蘋世鞅少息肩
忽憶江之濱園池既瀟灑竹樹清無塵念我羣從友欣
然奉雙親整冠自嘆息悲哉遊子身

東風解凍應制

去歲都城三尺雪御水潺潺凍全結半夜春從地底回
一片菱花煖初裂春風著水水不知縠紋澹澹按清漪
退朝閒步石橋上流澌半入昆明池黃柳垂絲拂東岸
蕩潏波心影凌亂青陽杲杲射圓沙幾簇魚苗聚還散

太乙東皇隨斗行韶華拍塞皆春聲臨流攬勝心獨喜
物色向人如有情天潢固是得春早坐想八方春更好
航海番人入貢來萬里川光淨於掃

春山雪霽應制

東風夜掃彤雲散坐見西山倚晴漢旭日昭回萬玉林
芙蓉百二光凌亂韶華却在瑤島中玉泉水來如白虹
野人行愛草木潤飛鳥下顧川原空乘春騁望登高閣
春意山容兩回薄天開圖畫繞都城共喜年初得嘉樂

太平有象樂未央不用大蒐開獵場鳳池舊重郢人曲
陽春白雪成新章極目崔嵬動遐想山下遊車護來往
滿前物色總宜人細麥青青更堪賞

癸巳日長至與世賢太史陪祀山陵往反得律
詩十首

沙河道中用廉伯贈行韻

冷吹搏沙沒草萊日高陰色未全開人穿敗葉林中去
路指荒城盡處回旅舍晨炊供熟黍譙樓晚角弄殘梅

五年不識風塵苦兩度叨陪李賀來

宿昌平再用前韻

暫停饑馬啄荒萊寒入重衾手倦開殘雪夜驚雙磧合
鮮飈晨送一陽回前村野色催行李何處歌聲調落梅
明發園陵天尺五溪山應識我重來

度東山嶺

石橋駐馬問田翁一塢深深隔樹東帝子閣前沙似粟
野神祠下路如弓疎松古磧風微動細草陰厓雪半融

回望紅塵才數里不知身在亂山中

用世賢韻

東山嶺上凍雲重落木寒山有虎蹤
薄宦征行非漢使老農歌頌似堯封
沙痕曳白縈枯葦日脚垂紅透曲松
短策羸驂驅不進濫騎安得馬如龍

齋所用世賢韻

齋居門對此山幽且拂枯枰角兩籌
百里風塵勞法從四陵雲氣想宸遊
官奴識路行篝火客子凌寒坐擁裯

不盡往來分榻意遣情時藉管城侯

再用廉伯韻

旋擁山爐熱斷萊疎櫺正對土牀開女牆月上催詩就
寢樹風殘約夢回雪後弊衾寒似鐵病來吟骨瘦於梅
空山露下人蹤滅忽聽鈴聲枕畔來

謁陵用東山嶺詩韻

十年如夢漆園翁兩度西陵更向東先帝未歸黃澤馬
小臣徒抱鼎湖弓明樓霧氣寒初散御沼冰花煖欲融

想得宸遊應戀此靈輿來下月明中

再用廉伯韻

野樵誰敢斲蒿萊翠栢陰中兆域開鵷序衣冠晨拜舞
龍宮星斗夜昭回宣章道士聲如鶴守影中人髮似梅
禮罷不須燈火伴聯鑣乘月下山來

土城懷古再用世賢韻

廢堞荒涼水色幽昔人曾此夜傳籌西風不見龍鸞過
斜日空餘鹿豕遊行旅似聞吹曉角直更誰復抱寒凋

興亡總逐浮塵散，輸却青山一醉侯。

入城與世賢別仍用其韻

曉過荒城望九重，馬蹄偏識舊行蹤。
河山沃野圍京界，煙火連村別縣封。
露氣漸消雙鳳闕，日華先上萬年松。
城門暫與君相別，還約聯珂覲六龍。

輓西安王太守

父守金華子守安慶
卷首有張東海題

太守王公家，太行埋玉雖久聲琅琅。
我觀東海筆循吏，生色澹沲如登堂。
公初作官不擇祿，海上二州成善俗。

後來坐治海豐城百姓至今猶聚哭西安大郡稱關中
賢守只云王海豐當時去思耿未已棠陰白草悲秋蟲
人言仕學皆前定陰功不似公家盛三世相傳五馬符
前有金華後安慶安慶高文如乃公不久報政蓬萊宮
璽書錦袍還舊物墟里一日生春風我憶王公渺何處
遺澤不隨漳水去觀風使者問先賢認取庭前古槐樹

題陳憲章梅花

燕南雪花大如掌點綴枯槎夜深響悵然忽思羌笛聲

恨不西湖撥雙槳趙君喜走江南村曉持寫真來扣門
小堂虛白凜相對便覺生意回孤根朔風飄蕭天色冷
的是當時湖上景摩挲欲掃樹間苔舒卷愁翻月中影
君家仙子真風流一醉曾賒紫綺裘羅浮山下作春夢
素娥執手增離憂聞君跨馬山陽去驛路還應得奇遇
逢人寄取折枝來莫忘西齋賦詩處

京師大雪三日未已予時獨坐槎山小處意殊灑然
適趙中美將歸淮南以陳憲章梅花求題因走筆賦

長詩一首詩尾引趙師雄夢梅事蓋以著梅為君家
物耳

甲午六月二十二日聞四龍掛空中大雨

迅雷殷殷聲動地一陣靈風送陰氣忽見四龍垂半空
頭角猶在烏雲中三龍蜿蜒只搖尾一龍爪欲翻海水
須臾分向東西行大雨颯颯如盆傾奇觀最是神龍變
臥病空床不相見坐聞客語心茫然葉公之圖人浪傳

盆池蓮盛開

盆池荷葉似人長
莖苗開成品字妝
無奈一春離思苦
賞心空負碧簫香

夏月坐柰子樹下

散髮蕭然坐月中
庭柯移影上簾籠
棲禽何事驚飛起
熟果因風墜軟紅

寄坦姪

一從相別潞河頭
回首風光已暮秋
知汝近來應念我
等閒誰伴竹林遊

月夜小飲李符臺家

綠槐庭下動秋風
草酌相看一笑同
久坐不知更漏永
月輪飛上屋山東

桃源圖詩

建寧邑令汪文煥既卒其子良佐奉葬縣之桃源
且繪為圖以致哀慕之意予感其事為集古詩一
章并以勉其孫之為諸生者

冬青之木鬱蔥蔥

楊廉夫

日落水流西復東

杜牧之

歲歲年

年人不同

劉希夷

桃花依舊笑春風

崔護

百年廢興增嘆慨

張文潛

落紅萬點愁如海

秦少游

今年花勝去年紅

歐陽公

明

年花開復誰在

劉希夷

可惜落花君莫掃

岑參

孤芳轉盼同

衰草

秦少游

對此如何不淚垂

白樂天

十年花送佳人老

蘇東坡

坡

志士幽人莫怨嗟

杜工部

看到子孫能幾家

杜牧

寸根

千里不易到

蘇東坡

留種河陽一縣花

瞿宗吉

輓丘時雍太守父暉菴先生

家住番水上從軍向遼陽
代父遠行役日寓刁斗傍
時

陳俎豆容絕學驚殊方坐令先軫徒摠衣進中堂歸來
迫遲莫喜有名家郎封君謝恩寵居然事冠裳春陽澹
暉暉顏色忽已藏人生首丘願浪蹤安可常偉哉全歸
子宿草今蒼涼我欲奠雞絮渺渺川途長

夏至日雨病中喜二弟來自南京

亢陽苦作厲人物皆昏如茲辰一陰生況與甘霖俱燔
燄忽已掃清氣回堪輿我方病炎熱展轉無寧居得此
若新濯灑灑心情舒依約小牀潤點射明窓虛況我同

胞子千里來寧子鴈行夜聯榻咫尺庭中隅琅琅語頗
聞喜今到吾廬伏枕聽簷滴漏下二鼓餘蘇韋有故事
莫惜花箋書

臥病

半生多病裏天不庇窮儒藥有尋方苦錢無賣俸餘暗
消閒歲月久廢舊時書却幸身長在愁懷且破除

半生多病裏天不庇窮儒兩句是骨子藥有尋方苦
一句貼多病字錢無賣俸餘一句貼窮字暗消閒歲

月一句貼半生字久廢舊時書一句貼儒字却幸身
長在愁懷且破除兩句又以見天終庇之之意而用
以自喜慰也大抵作詩不可全拘此律亦不可不存
此意若全不相照應如散沙相似亦何足為詩因吾
弟初學此故一言之然予作實淺陋不足師也

病中不寐簡仲弟

病中愁不寐起坐聽傳籌揀藥求新効敲碁想舊遊月
明窓向曉雨過簾生秋獨喜王孫草池塘綠似油

病中喜雨簡季弟

病中身貯火夜覺雨鳴階
厲氣潛收障清風細入懷
池翻疑倒海簷瀑似飛厓
咫尺齋居子歌牀有句諧

聞南都新開池館之勝漫摘坦姪二屬對成詩

二章

一川新綠板橋通更起盆亭著鏡中
杜曲兒孫供酒醖謝家兄弟走詩筩
草屨半濕莎庭露蒲扇輕回竹塋風
勝日無因陪勝賞只憑春夢到江東

別業新開水竹居遊塵全不到庭除棟花臺榭聞幽鳥
荻草盆池種小魚翁醉不勞方竹引客吟多借古藤書
何時罷直金華省日日江頭奉板輿

送同年友張天瑞之陝西叅議

瀛洲同會舊諸生分省西秦重此行河上未收胡地馬
關中猶駐漢家兵窮秋轉餉多民隱聖代旬宣屬老成
不負平生憂國志按圖先問受降城

西防之策凡三變初據河北以守受降城而胡馬不

敢南牧後舍之而守東勝矣守東勝已失三面之險
然黃河形勢猶與敵共今舍之而守延綏矣夫延綏
無險可恃故敵得全據大河以南臨關陝譬如猛虎
蹲于人之戶外其有能安寢以為宴然無事者非狂
即愚也凡出守西土者僕未嘗不以是告之而況同
年交好如天瑞者能不致愛助之意乎轉餉頻興民
力竭矣天瑞尚勿以腰金為榮而以為懼成化癸巳
七月望新安程敏政識

送陸司寇先生致仕還四明

先生韋布到公卿更向清時取令名兩鬢曉霜辭魏闕
一帆春雨下鄞城耆英自合當人望勲業都留與世評
歸去不愁朋輩少鑑湖煙水足鷗盟

杖履相從不厭頻通家惟我最情親雙蓮約賦池中瑞
一果親頒席上珍喜筵鷄行隨步武忍從鯨海送歸人
臨岐忽記當時事轉眼風光十二春

天順中先生與家君同僚壬午之夏走家蓮開並蒂

先生約同官者賦詩以為走中舉之兆明年刑部後
園諸果樹盡一春無著花者獨蘋婆樹結一果其大
如盃先生復折簡來餽以為走登科之兆其後皆如
先生言今先生歸矣謹著之詩中志不敢忘也

立秋日雨

涼風颯然至疎簾覺秋生炎熇一揮掃蟋蟀階下鳴玄
髮能幾時寒暑相代更感之臥復起彷徨步前楹微風
動衣袂肅肅天宇清帝鄉豈不好親舍難為情反坐念

歸計躑躅東方明

秋日病中

我本山澤臞不奈塵事擾趨朝與偃直長時失昏曉
況此疾侵尋藥裏詎能了頽然臥一榻頗似安巢鳥衷腸
雜雲亂苦恨知者少推窓一延竚黃葉墜林杪寒蟬固
切切砧韻亦裊裊羈懷苦難釋所思在江表何時促歸
裝天長塞鴻杳

臥病七旬方起試筆作字適世賢有詩見慰依

韻奉酬

獨臥空房思有餘
茂陵憔悴舊相如
病來自覺逢迎倦
客至從嗔禮法疎
風約黃塵凝硯沼
雨催青草上街除
讀君詩罷還成句
棗筆藤箋試手初

病中夜試新茶簡二弟戲用建除體

建溪新茗如環鉤
土人食之除百憂
呼童滿注雪乳脚
使我坐失平生愁
朝來定與兩難弟
執手共淪青甕甌
腹藁已破五千卷
舉身恨不登危樓
玉川成仙幾百載

清氣渺渺散不收
典衣開懷只沽酒
閉門却笑長安遊
送江淮衛知事沈德

沈君家住錢塘縣
自小從師學書劍
一朝隨牒上京師
總詫青油幕中彥
此時正伐西南夷
尚書帳前多虎豹
君來跨馬作從事
不怕羽檄如星馳
凱旋北闕方行賞
元戎再入東西廣
載筆先須揀俊才
屬橐又復辭天仗
竭來元戎罷遠征
却總江淮漕運兵
轅門案牘分曹署
巨艦旌旄作隊行
君在軍中不貪利
學取漢朝清白吏

主人喜是平江孫佐史還推隱侯裔手提長鋏漫空彈
一榻恒依大將壇半生飽識從軍樂八品甘為寄祿官
莫惜青衫留滯久老大功名須到手殷勤我是尚書郎
送別旗亭重回首

題牛次人韻

已銷金甲事春濃無復全齊火戰功惟有牧兒相伴在
一山桃樹半溪風

題小景畫

亂石溪聲到處聞疎林山色望中分幽人已逐移文去
閒却茅亭一段雲

題梅送朱伯承都運赴兩浙

不須持酒酌花神此去西湖正及春一樹官梅應待久
知君才是作羹人

恩壽堂壽張給事本謙乃尊教授致政先生夫

婦受封

可是名門積至誠雙親偕老向雲巖庭前椿樹堅持久

堂北萱花迥出凡振鐸清風傳矩度採蘋高韻協英咸
階除脫穎蘭初茁窓下抽榮草不芟驥子入官青瑣禁
龍章遙拜紫泥緘碧閨煥錫安人號錦軸新題給事銜
綽楔下臨涪水秀華堂高對蜀峰巉瓊漿獻壽稱金罍
彩幣將誠出寶函南現老人朝馭鶴西來王母夜乘麇
簷頭送喜蛛絲巧檣半留人燕語喃一日恩光浮院宇
四時佳氣動松杉仙家宴好圖中繪頌客文宜石上刻
況是夕郎歸慶處薰風雨露滿征帆

長至後二日山陵陪祀回適有詔修宋元二史
綱目不肖濫預率爾賦此

曉別園陵入覲來編摩誰意及凡材鵷班未放天墀散
鳳勅先從史院開朱墨兩函藏祕省是非千古在靈臺
叨陪敢繼春秋筆予奪還應取聖裁

成化癸巳臘月十日子生蓋三十年矣適有史
事不克歸省悵然有懷謹步韻家君守壽
詩一章錄似克儉克寬二弟

漸愁華髮鏡中生三十年來數賤庚未拂朝衣慚戲綵
每霑宮醞想遺羹傳聲自願如春好守訓何妨似水清
忽記夜深芸閣夢渡江稱壽最分明

戲綵遺羹皆思親事然綵與朝衣相應羹與宮醞相
應方不偏枯崔元馭云兒子遊宦有人云貧乏不能
存此是好消息若貲貨充溢乃是惡消息此好字之
本也魏武帝問胡威曰卿與父孰清威對曰臣父清
惟恐人知臣清惟恐人不知此清字之本也大抵作

詩不可草草觀者亦然因管城子便聊與吾弟一言
之

送趙良輔南遊

冬雨三日泥不乾一夜朔風吹苦寒壯遊喜君正年少
何懼悠悠行路難城隅木葉已盡脫曉鐘滿地催征鞍
丈夫出門即萬里對酒不用歌悲懽君之兩姊各遠適
三衢白下長眉攢天涯去住忽相見一笑頓使羈懷寬
江南勝處亦可賞吳山楚水多奇觀人生浪跡且行樂

長劍臨風時一彈歸來定是隔年事三月春城花未殘
白下之郎予季弟煩君致語多加餐近來聞說已勝我
文辭筆下驅波瀾蹇予苦被塵鞅縛十度見月空團團
送君不盡遠遊興悔作東頭供奉官

新居夏夜

雨餘風起月如霜白苧衣輕怯晚涼夜半呼童移席過
小樓簷下設胡牀

偶成

細竹編籬護老槎石盆新水淨無沙
繁枝嫩葉青如剪時見茶蘼放一花

輓朱維吉

一卧幽軒夢不回獨遺寒月照疎梅
夜深風露蕭蕭下恐有吟魂跨鶴來

磐石山前土一抔幾株喬木帶寒流
明明孝義題碑碣莫為時名弔奕秋

送廉伯陪祀山陵

奉祀仙陵第幾番又隨香帛薦中元馬穿碧樹知神路
人立青峯見寢園珮影夜聯東壁序鈴聲秋動北辰垣
歸途正及西城近黍稷屯雲遍野原

送曲阜孔知縣

奉檄初登子賤臺素王家世不凡材詩書魯壁新弦誦
井牧尼山舊草萊簾幕晝垂公署散盤盂春薦享堂開
暇時還約賢宗子共掃奎文石上苔

送克儉克寬二弟南歸

執手蕭然驛路隅西風黃葉滿征車來分姜被情無限
去著萊衣樂有餘丹穴暫棲垂翅鳳滄溟終起化龍魚
少年一第元非幸努力平生萬卷書

武昌太守行送秦廷韶考最南還

巍巍武昌城屹立江漢隅中有太守專城居太守北來
江水寒正直不憂行路難太守南歸春已老一道懽聲
動魚鳥武昌城中官長多能事不受相撫訶終歲足魚
米父老歌逶迤人言太守能賦詩太守不似元微之江

城坐治已閒暇一篇往往傳京師古來儒吏亦何有今
見風流武昌守相逢一別會何時目送飛鴻過樊口

題宗人愈大上舍所藏白描風荷圖

鏡湖水光如匹練一霎回風舞團扇馮夷乍起水晶宮
仙子齊勻鏡中面凌波徙倚欲傾城澤荇渚蒲如有情
素葯搖香白鷺下青房墮影遊魚驚落手湘雲半舒卷
晚色亭亭淨於剪五侯池館春闌珊恥共鉛華鬪深淺
浙江叅議盧君雍葬其父愛竹君子櫪山廬于

墓左產芝十二莖其壻編脩倪君岳求予詩

老人開軒舊愛竹令子廬墓新生芝歲寒節操凜未已
三春和氣鍾於斯土屋深深櫪山底十二天然朶雲蕊
孤絕難同衆草芳色映薇花照江水回望謝庭花滿煙
兒孫玉立如芝妍古人孝感非浪語至性由來天所憐

讀宋史

太祖

黃袍那得便加身禪詔由來宿構新地下董狐招不起

誰將心事許三臣

亂離初見武功成
掌上河東未足平
開寶八年歸正統
至公書法愛徐生

太宗

野錄山僧本好奇
是誰刪潤轉生疑
由來授受分明處
凍水先生却備知

金匱盟寒固可哀
何緣推出殺心來
斧聲燭影都無謂
勝國諸公有史才

成化甲午冬十二月二十一日祈雪齋居適吳
興沈用賓寓宿公署分韻得西字

寓公清致本茗溪借榻三回聽曉雞出韻令嚴詩律險
彈碁人倦子聲低清齋坐合金蘭契法從班聯玉筍齊
雅集又成新故事獨憐才愧庾安西

借前韻求用賓作晴洲小景

十年相見掖垣西聯句無才續鬪雞卷裏法書多魏晉
圖中山色似青齊莎庭驚鶴霜初下茗碗留人月易低

肯與家林揮健筆不辭新絹買鵞溪

齋居喜雪聯句

夜寒集疎霰

錢

歲暮呈嘉祥天心重昭格

簡

民事期豐

穰齋誠達宵旰

岳

祀出排緇黃同袍此共宿

敏政

旅夕能

相忘憑簷俯輕颺

錢

引燭驚微光嚴城漏聲寂

簡

小閣

爐烟翔簌簌墮庭庑

岳

霏霏闔堂皇

敏政

紫空轉飄撇亞

風隨低昂

岳

乍翻燕山席陡溢韓軍囊

簡

剪裁謝新巧

岳塗抹羞妍粧

敏政

同出聯祖禰分飛忽參商蠶繅散績

室舞袂投東房

錢

輝增氅衣淨爽激鑒鈴鏘長河飫堅

腹

政敏

斷嶺橫截肪隄穿夷險一

錢

羃野東西相

簡

雅棲

驚歌仄鳥篆餘偏傍

簡

清威折幽篁

岳

雀困餘粒絕免窮數置張委逕沒樵屐迴洲膠漁航

傑

望失遠山色

岳

坐想千林芳

政敏

先春奪造化異境開鴻

荒潛陽地中復

簡

宿沴物外藏餘孽息蚤騰庶徵宜染

梁

岳

樓居足酣眺市卧憐飢僵窓虛氣逾肅

政敏

景絕詩

能當

錢

雲英幻無蒂

政敏

水種空傳香

錢

槎通漢渚近

簡

賦擅梁園長

岳

關戍肌欲皴田畯樂未央

簡

沛澤決穹

壤至治歸明良

岳

竹宮怡聖情詞垣紀篇章

錢

邈哉繼

雲漢

簡

大慶垂無疆

敏政

成化丙申歲臘月十日倪侍讀舜咨程侍講克勤陸

修撰鼎儀陸編修廉伯同以禱雪致齋于翰林之東

署是夜雪大作遂用歐公禁體故事相與闔韻聯句

以志喜鈎奇競勝達旦弗能休時所得尚富澄汰僅

存此次晚出以見示復分二韻俾予竄入之且誌于

後云李傑世賢書

焚香聯句

齋夜對爐詠茲謀出于僉泰旃檀爇幽眇棐几增芳嚴

鈇瑰材藉珍重烈勢防太炎簡遠聞覺逾勝默叩如有

占傑片雲陡驚散一星歛疑燄岳口浥曹溪流耳割崑

崙尖敏氤氲燭映屏縹緲風回幰泰幻深隱金粟火褪

委紅鹽鈇芸憐書蠹辟麝恐庭花嫌簡當窓噴寶鴨隔

研縈銅蟾傑晚蘭格調絕閣梅風味添岳情通一瓣夏

劑許百和兼

敏政

循牀襲青綾拂卷凝湘練

泰

輸情已繩

直遜意仍蛟潛

錢

咀華厭雞舌采沫嬰龍髯

簡

籠煙袖

雙握撥地七屢拈

傑

氣合愜俱化心軌懼非廉

岳

繼美

薦奇印留芳下重簾

敏政

甲暖螺蛳腥班銷鷓鴣歸燭

泰

寧

為幕廣展不作吹輕纖

錢

春原得孤嗔曉殿思遙瞻

簡

透隙忽已駛入虛澹相淹

傑

升騰各登鼎瑣碎或在奩

岳妙遣葦穢屏馨達神明忭

敏政

終陪畫省直不受歌塵

黏

泰

薄溫變寒室長力窮宵籤

錢

靜喜日照席深宜私

覆簷

簡

非同火山熾何憂木天黔

傑

吟鼻詎堪擁德芬

方共厭

岳

燕寂未經宿呼童惜餘甜

敏政

成化丁酉正月八日齋居焚香清寂之際相與書三十韻次第拈押以遣夜懷既成俾予各錄一通時與者六人太倉張亨父陸鼎儀毗陵陸廉伯海虞李世賢新安程克勤云錢塘倪岳舜咨題

篁墩文集卷六十三

欽定四庫全書

篁墩文集卷六十四

明 程敏政 撰

詩

遊月河寺次韻顧光祿

時送張廷璽
郎中還南京

空門坐隔河風柳扇微和曉色城頭盡春聲水上多過
牆燕市酒倚席渭城歌不盡遊人興詩慳可奈何

一徑曲通河經春土脈和破籬編葦密老圃種花多惠
遠還能笑昌黎不解歌題名人半老莫更問誰何

挽金陵倪處士

侍郎謙之族人
李太常作志

家住修文巷俄然夢不醒
譜通宗伯系塚勒太常銘
猗頓千金產童烏一卷經
不堪人墮淚擇葬近新亭

鏡中偶見白鬚

時年三十

曉起掀髯笑不梳
鏡中霜到一莖初
他鄉轉覺官無用
半世空驚病有餘
閒處欲尋支遁語
老來思共阿咸居
平安獨喜南鴻便
一月常收兩度書

成化乙未廷試受卷紀事有作

大廷多士若雲屯
入對從容感至尊
新雨過城開曉霽
好風吹柳散春溫
尚方絡繹來珍饌
中使催呼鎖禁門
回首十年如夢裏
傳臚當日愧蒙恩

文華清禁接詞林
閱卷親勞法駕臨
黃紙墨痕春淡淡
紫垣鐘漏午沈沈
風雲此日開文運
忠孝何人契主心
今夜禮曹還賜燭
早隨冠冕聽絃音

壽靈臺郎吳英母九十

暖風開讌敞雲屏
慈壽從今數百齡
盤詰紫鸞恩浩蕩

傳書青鳥意叮嚀北堂秀發宜男草南極光躔婺女星
莫對絳人提甲子五官聲價重堯庭

夜夢家君曉起得家書時家君已得請還鄉

夢接庭闈語未闌曉來南鴈寄書還平安字抵千金價
晚節功成九仞山竊祿尚堪供薄養遠遊何日奉尊顏
遙知兩弟稱觴處綵服應留一副閒

瓊島春雲應制

五色氤氲曉未開一春長遶玉峯來成祥頃刻非無意

行雨分明是有才御氣遠通花萼殿靈根偏護栢梁臺
望中忽感從龍念恐有遺賢在草萊

季弟克寬來京師適當端午西湖南海之蓮尚
未有花而予家盆池特出二萼化工之巧有
若為予兩人者設耳克寬南行有期輒用開
讌以酌花因思予在西城時此花亦於五月
盛開司寇陸公輩各賦一詩以為予中舉之
徵其後果然今十四年矣故詩及之

誰家端午看芙蕖
蝸舍風光似有餘
苒苒紅苞初半拆
田田青傘未全舒
酒籌暗合愁新別
詩讖先徵憶舊居
莫忘弟兄攜手處
一簾花雨濕征裾

次韻羅明仲太史中元謁陵僕三度謁陵皆以
冬至又兩與李世賢太史行

陪祀頻煩下紫清
冒寒長記舊經行
風生古堠驚鴉宿
月滿荒城聽馬鳴
花鳥送君今日路
溪山回首隔年情
道傍老壁題詩處
定有居人說李程

送戶部吳廷憲主事赴廣西提學僉事得文字
泛泛濯錦江產材多好文就中吳季子壯歲迴不羣久
筮司徒班薦書新上聞朝廷重興學簡命恩禮勤乘驄
過梅嶺持節開江氛念子掌邦教此職固所欣都門時
雨晴岐路東西分嶠外豈無士成之在陶薰時名愧葩
藻實學須典墳典墳首群行古聖非徒云行行志方健
寧肯上負君三歲諒有期遲子來策勲

送袁士鑒太守考績還淮安得童字

淮陽今大府南北舟車通上官絡繹至卧治將無功使
君東南來瘦馬從一童績成奏天子出門歲將窮君本
法曹郎皎皎白鍊銅坐令郡訟稀風化千里同勸君一
卮酒美政貴保終不見古循吏名與長淮東

洞黃詞懷黃尚斌先生

職方彥俊之父
文選孔昭之祖

洞黃何逶迤遠在天台間壁立千芙蓉四顧相回環緬
思洞中人一去何當還平生讀書處松檜不改顏兒孫
日以長濟濟通朝班孰識巖棲翁高名配茲山我歌洞

黃詞悵望春闌珊生留杳莫致浙水東潺潺

大病不寐

月西窓正黑天色向黎明坐數傳籌者沈沈殺五更

又

溽暑人如醉昏昏一病身如何三五夜番作獨醒人

陸廉伯太史家賞蓮得天字

小院涼生雨後天一尊同賞甕池蓮散花曉日來天女
步月清宵見水仙坐客不辭浮白令主人何惜買紅錢

興來忍折芳筩盡回首風光又隔年

是日主人以綵繒纏荷柄故詩及之

八月一日丁祀夜作有懷彭文憲公

半夜奎星光燭天諸生雲擁戟門前閒階露下聽更坐
別院人稀借榻眠燈亂衣冠松外轉風清絲竹殿中傳
西湖故老今何許分毫叨陪記往年

賀高揮使生子

錦棚香襲舊征袍轉覺王孫甲第高喜氣鎮浮三日迥
啼聲渾似五陵豪四筵湯餅朝開讌左戶桑蓬夜屬橐

已是他年真將種殷勤傳付呂虔刀

送耿司業先生省親還南河

白髮萱親在北堂喜承恩詔趣歸裝秋容黯淡辭都下
曉夢依稀見洛陽萊子舊衣增刺繡陽城新例有封章
疎庸濫逐門生後駐馬離亭盡一觴

文淵閣大學士彭先生哀輓

廊廟憂深病亦深西風庭木動悲吟文星一殞嗟何極
哀詔頻頒似不禁三館尚聞修宋史八方空復望商霖

平生忠孝封章在不負先皇策士心

乙未十一月十六日長至有感

白鬚又添一莖

吟鬚再見一莖霜愁思應隨一線長月色也從今夜減
酒懷爭似少年狂海榴漫說偏多子喬木誰憐隔異鄉
好是浮名歸未得十年辛苦尚為郎

尹亞卿家飲散用韻二首一讀景帝謚議一謝

盛筵

天賦宗賢撥亂才八方威命響新雷袞衣立受東朝命

玉輦迎從北地來九廟有靈知孝友百年無力報奸回
今皇盛德嗟何極一紙虹光燭夜臺 右讀謚議

勝日叨陪玉署才綺筵簫鼓沸晴雷宮壺尚足傳盃用
堂食初分入饌來拂座面驚春色動聯鑣身帶夕陽回
題詩欲盡留連意長句無能效栢臺 右謝盛筵

臘月念八日得仲弟克儉南京書季弟克寬杭
州書報家君已至徽州

兩回家信一時聞北鴈如何久離羣同氣影隨三處月

老親身卧萬山雲懷歸有約多成夢竊祿無才可報君
學業半荒鬚漸白愁顏消得付餘醺

燕都石鼓題廣人黃瑛江湖勝覽卷

岐陽埋沒草離離
汴省燕都嘆屢移
一代文章存鳥跡
百年風雨蝕鼉皮
摩挲尚識宗周器
題跋誰鐫蒙古辭
却愛勝遊黃叔度
孔庭懷古立多時

白雲深處為天台趙時暉賦

幽人卜築嫌山淺
直入雲山十二重
傍岸野樵多失路

隔林溪碓遠聞春衣裳露宿嵐光冷書畫晴蒸海氣濃
極目為君思鴈蕩爛銀舒卷正溶溶

朔州行王汝璧太守述職西還

朔州城頭塞雲結朔州城下沙如雪赫連古戍白草枯
一路角聲吹不歇居民半是防秋兵十里五里屯軍營
偏師夜坐烽火息飛輓小兒歌太平王郎家世本靈武
明目張髯氣如虎羽林驕將不敢欺磧裏人耕好田土
窮州十年多苦辛奉檄東來覲紫宸長官知名聖君喜

邊吏有才能幾人遙遙朔州城勸子一卮酒馬蹄明朝
向山後女牆孤月重相思定倚危樓望南斗

成化乙未元夕觀燈應制

萬歲山頭春月圓萬歲山下霏祥煙蓮花漏水盡一刻
火樹百枝光燭天條風東來送新暖低颺星裘動黃繖
九重金闕倚岩窈四面紅雲簇簫管慈闈更欲親承歡
綵棚十丈空中攢隨山移仗不知曉應制還催供奉官
五朝故事傳來久樂與民同上元酒想像先皇得衆心

尚有燈詞播人口太平喜是百載過邊燧不驚天氣和
古來張弛皆有道實心一日非為多

十二月十三日大雪

北風吹晴無片雪老農戚戚生窮悲土中細麥乾欲死
方士結壇徒爾為殘年一雪萬人喜天子憂勤天與之
長安貧者死莫恨記取當初望雪時

挽薛節婦

監察御史為
學之祖母

薛家賢節母身住潞湖村老去霜春面歸來月夜魂孤

鴻難再偶慈竹自添孫不負生前恨金書照里門

卜築

頻年生計拙辛苦又移家未到新庭院遙憐舊月華時
名只人後歸夢幾天涯銀漢猶明沒因風欲汎槎

著存堂為吳節參政賦

悠悠三十載一飢不忘親推枕猶疑夢登堂若見人海
桑初隔世風木幾傷神要識全歸意平生在立身

雨後絕句示小女

天井無沙潦水空臨流一樹石榴紅女郎學語驚相報
幾辨臙脂落鏡中

題姜廷憲中書小景畫

雨落山前雙樹村石溪流水帶沙渾野人赤脚如歸鳥
不怕春泥半擁門

哭坦姪二首

兩地驚心最可憐別來長夢抱兒眠豈知一段青雲器
只向人間住八年

慟指蒼天淚兩垂
海枯難盡竹林悲
牀頭幾卷殘書冊
一世辛勤付與誰

送徽州謝同知伯儀慶賀建儲禮成南還

郡紱驅馳不憚勞
又驚飛絮點歸舠
八方共喜前星耀
千里回看北斗高
闕下省臺通姓字
山中城郭候旌旄
因君不盡東南望
一片鄉心折大刀

丙申郊祀齋居次陸廉伯太史韻

東風吹冷襲虛襟
芸閣西頭接羽林
上界疎鐘清客夢

廣庭明月空齋心回驚舊壁題名遍轉覺微官閱歲深
此夕園丘天尺五擁衾時聽屬車音

露下虛庭月滿襟仰看殘雪冒疎林久叨禁直隨班尾
共誓齋明協帝心三宿夜分蓮漏永一年春到竹宮深
題詩欲繼雲間陸蟬噪終慚海鶴音

次謝鳴治侍講韻

井鳥聲與柝聲兼閣道頻將斗柄瞻郊壇禮神春奠玉
齋宮清蹕夜傳籤月中曉色驚先白雪後寒威覺倍嚴

三日清齋無一事
水沈時向竹爐添

慶成宴與明中舜咨聯句和韻

賜筵初及試燈時
一日風雲會殿墀
天靜漏傳金箭迥
曉寒春上玉顏遲
羽林扈蹕環千騎
宗伯垂紳正九儀
胡越一家同獻壽
八方誰道路多岐

送刑部郎中陳德修還南京用張汝弼駕部韻

旗亭柳樹拂頽牆
祖席朝來掃半堂
廿載不知遊宦久
一春偏覺送人忙
東風似與歸途便
流水何如別意長

執手難留陳仲子錦帆回首正高張

送薛志淵御史隨都憲袁公處置荆襄志淵舊

嘗巡按其地

聖主臨朝重拊循襄樊行幕繡衣新一方喜入皇圖遠
十載愁聽捷奏頻好計公田收菽粟旋分官府闢荆榛
土人半識招安使馬首山川屬舊巡

廣人黃昊久客于外夜夢二親自寫其像號其
堂永思其父嘗為主簿

細草雙墳隔幾春天涯回首淚沾巾淒涼死別空成夢
想象生容自寫真嶺嶠飛雲時出岫滄溟流水任揚塵
傷心莫遣成衰落不負庭闈在立身

錢塘沈德自成化丁亥以來從家君征川貴
山都掌之夷又從平江伯出鎮兩廣總督漕
運清謹之操三度如一家君薦之始自從事
為選人平江凡七薦之乃自江淮衛知事改隸
通政司於是薦紳君子無不嘉君之能獲

乎二公也拜命言旋賦詩以贈

曾從川廣著征袍又辟江淮督餉艘舊業恥緣行橐富
新名多逐薦書高銀臺已換簪紳貴玉帳應酬案牘勞
莫為官成心便得十年恩澤慶難遭

三月十七同日得王貢士寄來休寧臘月書馬
亞卿寄來南京二月書

客邸瞻雲思有餘忽傳門外送雙魚正當南北相望處
連得春冬兩季書千里開緘如面對一番披讀即眉舒

年來轉覺歸期緩日日經幃候起居

送蜀士趙顯章赴涇池訓導

池學有曹端先生祠

薰風吹路鐸聲清行李飄蕭出帝城洛士自今霑化雨
川人從昔有文名峻函地接關河便秦趙臺危草樹平
黌舍有刑知尚在好將蘋藻薦曹生

送克寬弟南還至茶菴獨歸

垂野陰雲一望迷送行愁問路東西不知幾日黃梅雨
門外青泥沒馬蹄

賞心已負一年春
野寺從來別恨新
酒盡沙頭催上馬
斷堤新草獨歸人

一徑棠花照水開
可憐新病廢銜盃
早知別淚多如雨
悔不臨岐盡醉來

題劉廷問舍人所藏夏仲昭太常晴雨二竹

太常醉搦紫宣毫
不寫李王金錯刀
閣舍朝回卷簾處
楚江風雨戰秋濤

舊宅依稀練水傍
古墩幽竹自成行
披圖却似身重到

刺眼脩脩鳳尾長

送奎文閣典籍許節之東歸

寧陽許君節之故閣老道中先生之中子仕為奎
文閣典籍博雅好文克世其學見重于孔林者久
矣成化丁酉上京師以其先人卹典未備告諸朝
獲有尚書之贈又於今閣老壽光劉先生締姻好
焉君既上顯其親下成其子將納祿于吏部浩然
東歸劉公子鎡請予言道其行子嘗執經壽光館

下樂其人為賦古詩一章

東山舊名家文章羨之子先人國鉅公勲德藏太史當年受推薦簪紱升孔堂日坐圖書府上應東壁光竭來走京師奏書析帝寵南宮下新制矐矐賁丘龍還思畢婚嫁館甥得劉郎官途凡幾月冰玉相扶將人生天地間亢宗似君少塵鞅不可羈拂袖一何早薰風日夕至滿路飛楊花都門戒晨發祖席臨水涯心知共月明千里一回首良晤詎可期屬酒為君壽

送戶部石宗海員外赴四川提學僉事宗海子
同年嘗為翰林庶吉士

徂徠家學未應蕪喜奉新恩向蜀都
黌舍威聲思按察
玉堂丰采重司徒行臺曉月諸生試
比屋春風五教敷
相守不堪相別處
暫留驄馬盡離酤

送中書舍人桐城何志廉赴南京刑部員外予
較藝禮闈志廉實預事于簾內

郎中早發帝城東
雙旆遙乘雨後風
南部司刑千里別

中朝揮翰十年功何當把酌尋鄉好猶記篝燈宿至公
從此魚書知不斷兩京新路牖河通

次南京錢學士先生入朝之作時先生方有少
宰之命

十二年來出帝關北歸仍立舊鵷班交南使節陳臨海
江左文名庾子山簪紱又新池上寵冰霜難老鏡中顏
漢庭欲下安車召楚水燕山路不難

桃花零落舊玄都喜見腰金尚黑顱才藻自能當萬乘

筆鋒猶足掃千夫禁中前席多需賈海上生祠半說蘇
晚節從來須鄭重百年文運藉人扶

新安洪生通今鄭州守有約之少子鄉進士遠
之弟而予兄汀州貳守克和之壻也來京師
從人受春秋學日以成歲暮欲將往省于鄭
且南還入郡學以竣秋試其志可謂健矣道
別之際賦詩贈之

綵衣遙向鄭州城書劍還為故國行官邸冬溫先季子

京闈秋試待諸生匆匆立馬辭鄉丈草草傳觴媿館甥
但喜家聲常不墜一門難弟又難兄

邀同館諸公賞盆池蓮

新秋團扇不禁風退直相期出禁東池館不嫌來結社
水花猶有一枝紅

題尹正言學士菊

陶家莊子未全荒離下西風一逕霜紅紫相看零落盡
寒花只作舊時黃

題畫

蒼山茅屋歲將闌一卷黃庭讀未殘
落葉暗橋何處客杖藜來聽水聲寒

講筵命下甚愧疏庸不足以從諸君子之後輒
賦一詩錄呈舜咨侍講養正伯常二太史

天王重稽古文教被九寰濟濟夔龍徒終日奉譙閒自
慚樗散質久厠詞林間一旦誤簡知許綴經幃班儒冠
豈徒榮君德重有關格心古明訓志士亦孔艱況我本

承乏何恃開天顏所幸同袍人逸駕難為扳致身及此時淳風正來還策厲敢不勉主恩似丘山

爲柳楷序班題壽意圖歸慶其母

七十柳家母雙耳被華髮行步若飛鳬飄然有仙骨諸子數公權供奉廣寒闕回首夜何其天涼桂花發神娥海東至蕩潏凌波襪皎皎青鏡中居然事修謁酒酣一借問滄溟幾時竭攜手問清淺共拾蟠桃核仙凡隔塵水三山翠嶢岼可望不可親歌詩對明月

壽泰和王希誠七十

希誠尚書文端公第三子
中書舍人求之父嘗受恩

封

七十存齋叟尚書一令孫天開新壽域人羨舊清門
蔭子傳家學封君荷主恩一陽初復候佳氣滿芳尊

西江多逸老季子獨超羣仙授還丹訣家藏說玉文
逢辰題甲子閱世等烟雲想和長生曲因風一寄聞

嘗有說玉
文贈之

楊文
貞公


題玉堂散直圖送吳汝賢修撰省覲還閩

金殿當頭玉堂署十二朱廊隱宮樹衣冠濟濟堂中人
猶似前時起居注門下斜連金水河石橋五壘橫蛟鼉
扣閤不許外人到挾冊時見諸王過奎文上應圖書府
插架連籤照今古同遊恐是十洲仙下界紛紛半塵土
邇來新詔開中堂儲材聖訓何洋洋日令三館坐羣彥
應制往往催詩章從容退食龍樓外松下傳餐解簪帶
光祿之酒大官羊終歲天厨有佳賚宮壺早午漏未央
旭日半下城西牆出門跨馬人分首緩步不知歸路長

老璫如能解人意慣識青衫閤門吏幾回爾女笑相嘲
何幸相從禁中地我居史館今十年碌碌追陪叨俸錢
就中却愛吳汝賢才氣迥出千人先承恩謁告辭丹宸
綵服輝輝照秋水何人為寫玉堂圖天上風光動桑梓
我思古人不可當身在江湖憂廟廊君是八閩奇俊郎
一飮之際寧可忘君家二老俱無恙莫遣文章負今上
朝朝散直定思君早趣歸裝拜天仗

題安城彭學士山水圖

何人結屋青山裏終日開窓見山喜近峯錯落走簷牙
遠岫蜿蜒插天嘴澄江一道山前過短櫂平分浪痕破
船頭水氣綠侵衣載酒高人面山坐石泉下衝沙渚渾
桑榆接地成深村柴扉欲扣不可到或有細路通雲根
竹鶴老人名畫手半幅生綃大於斗水分山斷意無窮
目送飛鴻度江口安城先生塵慮脫南望鄉人楚天闊
高堂永日對山歌肅肅涼風起蘋末



篁墩文集卷六十四

欽定四庫全書

集部

篁墩文集卷六

六五

詳校官編修_臣李堯棟

中書_臣劉源溥覆勘

總校官進士_臣朱鈐

校對官監丞_臣張曾炳

謄錄監生_臣王思涵

欽定四庫全書

篁墩文集卷六十五

明程敏政撰

詩

齋居有懷李賓之侍讀次街字如字二韻

月明人語靜天街一樹松毛舞亂釵高論誰翻巫峽水
相思如隔葉山厓百年散地堪藏拙三宿齋居漫寄懷
獨幸太平今有象南郊春意十分佳

郊祀前祈雪新歲
人日及郊祀之夕

皆晴明
故及之

瀟灑仙郎玉不如春來多病想離居賡酬未覺詩禪定
笑語偏驚墨妙疎齋舍月明燈暈小嚴城風靜柝聲虛
知君此夕應無寐起望星垣候屬車

羅明仲以所和謝鳴治枕上有懷李賓之之作
見示倚而和之

西齋涼夜月生初二妙詩成一枕餘春谷芝蘭香鴈蕩
秋空冰玉倚匡廬寄聲白雪來青瑣落手明珠動綺疏
讀罷悵然思短李平生交好最知予

鳴治天台人明仲
吉水人家有冰玉

堂故
及之

正月十二日慶成宴後有懷賓之用鳴治紅字

韻

賜宴歸來醉頰紅故人清卧曉堂空
聯珠似覺新篇少倚玉猶懷舊席同
春到才情翻蜀綺病回風骨挺湘筒
一年燈火西城近無限相思月又中

宴歸忽思明早立春再一日元宵矣節物驚心
為之憮然偶成東倪舜咨侍讀

又陪郊宴戴恩回不覺春光次第催
鼇禁未燒千炬燭
鳳簫先動六葭灰
喜逢令節添新歲
恐落明時數棄才
欲向同人歌老大
陳根已負十年培

舜咨有詩見答再用韻復之

春去如流不自回
駑駘無力可鞭催
風花近日多新稿
簡冊何時拂舊灰
十載閒官真負主
八行明詔欲儲才
支言敢恨知音少
一寸心田只自培

送陸文量駕部出使河南次留別韻

曾接芳鄰會一茶蓬門長許故人過
郎官標格晴翻雪
內史篇章醉吐霞
明日又攀東郭柳
當時同看上林花
春風聯佩相思地
玉陛鞭聲散曉鴉

凌季行鴻臚索賦清懶詩

不受黃塵點賜袍
朝回長卧日華高
客疎幸免逢迎禮
官冷那知案牘勞
勝地春風閒謝屐
異鄉秋雨溢并刀
等閒却有難忘處
淪茗催詩夜續膏

題李世賢太史扇

浦上南風急漁舟破浪還不知離岸遠時見樹頭山

分得知字送文公十世孫燉襲翰林五經博士

歸奉祀事

長河發秋水白日吹涼颼冠蓋集都門把酒與客辭緬懷紫陽翁耿耿百代師雲初襲簪組乃在休明時夫君抱奇服承恩固其宜考亭渺何許孤絕天南涯喬木上參天下有先公祠君歸拜家慶燼若階庭芝大賢本不死冥邈諒有知翹首北來鴻車行勿遲遲所願崇正學

慰我長相思

送提學戴廷珍御史考績還南畿

離旌動朝旭憲節飛寒霜使君有遠役驅車上河梁夙
昔金蘭交念君才且良南畿數千里弦誦聲琅琅來荷
天子恩去慰諸生望君家大江西經學聞四方敬承久
不衰顯擢殊未央古人過化地名與江水長分岐意無
限再進黃花觴

輓王瑞給事父

屢辭公府薦贏得隱居名水石夸王令江湖繼陸生無
方堪却老有子解推榮小茗山前路行人亦愴情

三月一日壽楊司徒夫人六十

家聲自東魯門對重關西象服搖蒼水鸞封獲紫泥晚
春開壽域遲日麗中閨想象稱觴處仙人餽棗梨

覽鏡顏猶壯盈簪髮未疎壽當初度起春入二分餘君
子歌偕老兒孫奉起居蟠桃親手種喜色照庭除

題張修撰養正所藏王舜耕山水畫

山東老人王舜耕平生與山如有情左塗右抹何草草
却似真山被山惱山西太史留侯孫愛山自謂山可殮
坐中忽有青萬竄終日仰看看不足我來把玩未始奇
真山假山遠莫知天風慘澹動林壑浮嵐積翠空淋漓
斗壁飛流下深樹暗響潺潺不知處兩厓中斷一橋通
誰結茅廬傍山住老人一去何當還太史心胸如此山
題詩不盡畫中意夢落齊州蒼翠間

夏日偶成

瓜頭果葉未全開一寸新根蝕舊苔
閒上小樓看雨脚不知青蔓過牆來

愚樂菴為傅曰川太史乃尊賦

不辭提甕灌山畦繞屋江聲似冉溪
却笑永州憔悴客壺觴終日嘆羈棲

靜對蒼山閱歲華人間何地著生涯
繡書忽到無言處陋巷春風自一家

題常州卞六行樂圖

素純衣摺皂綸巾不受長安馬足塵香繞鹿車秋未老
勝遊知是惜花人

苦雨漫興

久病朝籍未通名雨窓且得卧天明御街石路光凌亂
坐想諸公把滑行

青裾白面掃晴婦馮仗精靈格上穹黑雲西行雨脚退
針線女兒爭奏功

坦菴為鄧州訓導胡直賦

隨分安居結數楹出門何處不堪行知君已得義經趣
眼見高門棘刺生

泮鄰書屋為會稽處士賦

處士家在秋風浦之西泮宮之東故因以

顏其居二子曰雲丙子貢士曰榮士辰進士

墻間事埋築賈肆競刀錐擇居苟失所媚學將從誰所
以孟賢母三徙泮宮涯千載有楊翁衡門久棲遲誦法
子車氏有家學東陲杏壇藉餘蔭芹沼分清漪緬懷鄒
魯風禮庭時一闕歸來課諸子肅容坐皋比日夕弦誦

聲互答相吾伊居然二雛者成名皆在茲科第固云好
德性能自持坐令環堵宮永作藏修基斯人去已遠家
訓凜不衰芳鄰接孟氏此語非夸毗我歌泮鄰詞秋風
有餘思

題鮑栗之通判所藏四景牛

遠桃舒淺紅獨柳蔭餘綠烏犍何從來駢首度川曲春
波浩沄沄好雨夜初足憐此畊力疲田翁能羈束

山檨葉如斗負此大石傍捫兮喘何急徙倚南風涼子

牛卧弗起似戀青草長安得伴樵牧留連至斜陽
農事早登場散牧清溪許迎風或長鳴已忘力田苦出
門認紅樹對岸饒青莽日晚欲收欄橫吹隔深塢
晏歲風霜多朔氣動墟落畏寒老穀棘引犢屢前却靄
靄向陽坡梅花點放萼養力待春來郊原事東作

次韻蕭文明給事元日早朝之作

綵鞭聲裏曙鴉稀劒佩森森拱太微日射御牀明繡袞
雲回鑾輅見青旂鴻臚立仗傳三唱馬監隨班鞚六飛

曾記昔年叨侍從起居長許近皇闈

陪祀南郊借尹先生往歲扈從看牲韻

紫壇中夜肅無聲玉趾親來薦璧聲華蓋雲垂如肝蠶
行宮塵遠自屏營九韶迭應鈞天奏萬燭高聯複道明
陪位禮成因北望帝星當宁泰階平

次韻李賓之侍講慶成宴上作

門宴分行首從官內前隨例奉宸歡衣聯錦獸睛偏見
漏咽銅龍午未乾羽戚兩階成化久風雲千載際時難

桂坊敢負平生操漢策分明戒史丹

上元日承邵文敬主事請遊神樂觀次韻二首

南郭春風引瘦驄上清元不受塵蒙鶴因看院留當戶
驚為求書畜滿籠賭令歡呼拚一醉彈碁消遣任誰工
興酣頗愛青天曲隔坐還思喚舞童

曲廊深處綰吟驄招致羣仙我亦蒙院靜不聞清籟發
壇高時有翠雲籠一春宦海乘多暇何處燈山說最工
更欲早歸尋舊賞夕城高樹遠重重

剪燈歌元夕同年傅商佐主事家席上作

上元燈火如繁星九衢鬪靡流晶熒就中一椀最清絕
炯然獨照郎官廳都城好事爭來看苦心每為良工嘆
并刀剪碎藤溪方直縷橫絲眼中亂海市樓臺初隱霞
渚宮人物紛如麻天孫夜開機上錦魔女曉散空中花
態真意遠不可了此藝從知古來少頗聞令愛手能續
何得凡家擅天巧寒窓有女方十齡欲遣從之愁未勝
小弟長慚負奇賞先請為兄歌剪燈

傅家麵食行

傅家麵食天下工製法來自東山東美如甘酥色瑩雪
一由入口心神融旁人未許窺炙釜素手每自開蒸籠
侯鯖尚食固多品此味或恐無專功并洛人家亦精辦
斂手未敢來爭雄主人官屬司徒公好客往往尊壘同
我雖北人本南產饑腸不受餅餌充惟到君家不須勸
大嚼頗懼冰盤空膝前新生兩小童大者已解呼乃翁
願君飮餽常加豐待我醉攜雙袖中

琴月齋為姑蘇顧君賦

子夜羣動息虛齋敞前楹美人耿不寐起弄朱絲繩肅肅天宇高璧月流晶熒霓裳非雅歌叢桂多古聲幽懷浩然瀉紛紛竟何營

畊讀為建昌士人賦

古來業詩書守分樂田野緬懷有莘人感激千載下畊讀者誰子若與世情寡朝出向隴頭一卷書在把莫歸聲吾伊隱映粉榆社漢庭日選士孰是力田者願見書

有年幽風續周雅

送陸克深員外知叙州府

翰苑曾通籍祠曹久綴班
片符分虎重雙轂映朱殷
具服朝辭陞嚴裝夜出關
親交開祖道遠役壯離顏
蜀嶺烟嵐匝瀘江雪浪頑
傳餐迎驛吏撾鼓拜溪蠻
榮戟通公廨茶鹽擁市闌
升堂延俊造入境問痾瘵
僻縣經過少高齋案牘閒
奉宸瞻北斗懷土夢東山
宦海嗟行住詩郵足往還
來朝應可冀弱柳未須攀

次韻倪舜咨侍讀省親南歸留別二首

曉日河梁又送歸，畫檣天杪見巍巍。
賜金喜爾重供膳，密綫慚予屢換衣。
南浦一番春草茁，西山隨處暮雲飛。
燈前久辦寧親疏，不向同人惜暫違。

柳梢春色未全勝，別路危闌一共憑。
交味似傾醕醖醖，離腸難斷轆轤繩。
名高講席恩偏荷，喜溢親庭壽屢稱。
忠孝想君心力健，遄歸應不待河冰。

次韻羅明仲洗馬新春繙閱經史之作

是非千載若為評出處當知不異情仇薛未堪興禮樂
管商何得擅功名飲餘安樂春風暖夢覺空同夜氣清
此境與君能一到人生方不愧軒轡

郢調誰云客和稀孔壇風景尚霏微顏淵豈為貧方樂
蘧瑗能於老覺非近代情詞多逸響古來心學有餘輝
太平儒效收公手淺薄終慙負衮衣

會昌雪亭公子許雨中移竹詩以訊之

八尺庭除半綠苔一春無意買花栽幾時憑仗連朝雨

分得青鸞數尾來

春雨應制

密雲起東郊
靄靄覆高閣
條風一流轉
好雨應時落
冥濛浥街塵
頃刻滿城郭
坐見西北山
千里翠如瀾
粼粼玉池水
瀲灩聲赴壑
微虹隱木杪
生意動花萼
田家方播種
喜氣欲騰躍
行看土膏潤
不畏溝塍涸
龍德普所施
預想秋大穫
仰首謝玄功
對物有餘樂

張公子行一首送太倉張漢南歸

漢揮使之子友人陸文量

職方
之壻

張公子留侯孫少年丰采如香蓀讀書擊劍窮朝昏海
邊甲第開轅門堂上將軍不好武千里歌吹聞兵屯平
生陸家親昆弟託好願比朱陳村有女近出職方氏輦
金輿幣來求婚職方擇壻正復爾械書許聘情何惇張
公子佩赤璫刻絲袴褶懸兩弭去年跨馬入京國一見
笑語回春溫畫堂紅燭謝家慶整日開燕刲羊豚新郎
二月發歸思行李齎送聯征艫牖河雨過沙水渾旭日

半下東城根柳枝未堪把勸子白墮尊人生歲月驚濤
奔他時富貴豈足論水玉相輝古難得忠孝莫負君父
恩

送雲南府學司訓高宗禮

昆明池水隔天涯萬里西行喜過家莫嘆青氈清似水
文風今日似中華

行人無奈歇征驂儘與朝紳接笑談他日重逢知未老
內庭供奉亦何慚

煩寫新容出鏡臺少年衰陋本中材遠人若問程宮講
應詫君曾識面來

高君宗禮蜀之會川人起家儒學而出其餘力以寫
真妙得蘇子之說其待次吏部也薦紳樂與之遊既
得雲南府學司訓行矣而為諸公挽留者兩月子亦
雅善無可為別賦三絕以贈之

送鄉人吳之寬南歸

暑月終南訛靈風動西顥季子江上來言旋亦何早今

年霖雨賸九陌積行潦憐君千里外淨若水中藻坐與
親朋俱客舍靜逾好妙指高山曲細字浮溪稿有時扣
我門譚吐亦傾倒依依鄉土情忍別縈懷抱開舟潞河
潞策蹇長安道因君重回顧家山有遺老竊祿十載餘
主恩空浩浩何時許歸覲看穫江南稻練溪拖晴雪屏
山對蒼昊階庭倘休暇相期共幽討把手各西東停雲
下瓊島

吳碩之寬世居休寧之璜源讀書工琴有聲江湖間

成化丁酉春偕僉憲婺源汪君希顏上京師希顏之內之寬之姊也相與僑居都城外凡月餘時積雨彌旬之寬足不妄出而數尋見過又假予所藏先達淳溪汪公之文手自傳鈔亦可謂質美而好學者哉未幾告別南歸因念予自壬辰以來欲為省覲之行者屢矣講筵史局勢不敢以私請故送之寬而有望雲之思焉

送蕭文明給事持節冊封唐府得承字

藩封遵舊制天語重親承玉節龍垂綽朱函鳳結滕使
鏡聯紱并行李却金繒翰墨心偏健舟車力更勝王孫
加禮貌官吏足聲稱永日花明驛南薰麥蔭塋觀風臨
涓水懷古望春陵封事思晨入嚴程戒夙興縈還應幾
月青瑣候良朋

陪祀西陵昌平曉行

雨淨關河不受塵一時吟眺薄秋旻樹頭黃屋如看畫
馬首青山欲近人

道中偶成

望望西陵近松陰石徑分倚闌斟磴水下馬讀碑文寢
樹含秋吹橋山出暮雲野人懷帝力歌頌道中聞

夜半出山

藏事下西陵歸鞍趁月行松林人影亂石罅水聲清不
覺山程遠推便野望平臨風歌一曲秋思滿空明

題李太史世賢梅花圖集古

四山多風溪水急

杜工部

隴上何人夜吹笛

王右丞

幾家春

夢未知回

冠萊公

起傍寒梅訪消息

李太白

宛然姑射子

賀方

回

瀟灑在風塵

李太白

北人初未識

王介甫

疑是弄珠人

王適

西湖處士骨應稿

蘇東坡

洗雨梳風為誰好

秦少游

呼兒覓

紙一題詩

杜工部

相對真成被花惱

黃山谷

克寬弟南歸小詩二首奉簡淮陰驛丞林文秀

內兄休寧上舍汪汝溫親契

舊榻凝塵歲屢更秋風一鴈又南征弟兄離合情無限

萬里淮天共月明

右簡林

南望家山有所思十年誰共菊花卮不堪遠鴈傳書處

又是重陽送別時

右簡汪

題便面小景

相看是何境鶴啄松根苔道人一揮袖天末海風來

穀菴為吳醫沈公美賦

沈翁隱侯裔素醫而好儒有方不自秘云是瀋洄書繞
菴播嘉種歲歲勤蓄畬平生活人手荏苒七十餘種穀
如種藥心與造化俱豈徒一身飽固欲周鄉閭時今菜

色者一半回敷腴永懷居藥翁慨彼肉食徒安得味斯
語仁壽躋寰區

蒙巖為常州邵士忠處士賦

蒼巖何巍巍壁立倚晴漢中有一泓泉淅瀝下巖半綠
蘿水簾瀉觸石星珠散紆回坐成池隱隱白虹粲巖棲
者誰子跼步得幽觀徬徨此水側日夕味爰爰炯然生
道心舊染如濯盥不學蒙園叟偶爾事空玩養正思古
人因之重三歎

題尹性之御史所藏周文靖竹

周郎識此君落筆琅玕長居然步湘皋翠袖忽兩兩相
將舞回鸞勢欲凌波往平泉與危石轉折助清響坐令
俗耳淨遠覺煩襟爽亭亭吉甫孫霜臺絕塵鞅晏歲凜
相盟虛心愜終賞

送王司訓之任豐縣

父兄留得舊羶青子弟終能守一經博士隨班承寵渥
諸生開館候儀型到時俎豆陳宣廟去路河山擁漢亭

想共令君談政教化行歌頌幾時聽

馬邑王君鉞其先子巍嘗教于河間歷官大名郡守
兄鏞嘗教于新安近為國子學正君得諸家學者有
素而屢弗利于秋闈遂援例出教豐縣予故家新安
而宦居河間於君父子相知最久於其行不能忘言
豐之尹田君良故嘗教于三氏學亦於予有一面之
雅因詩及之

張汝弼駕部求椿庭詩壽其兄

貽謀能是守株人東海家家說異椿壁上古陰回夕照
庭中新幹薄秋旻衣冠幾葉能詩禮堂構當時亦與輪
張仲平生知孝友連枝應願八千春

分得元君丹白為安城李珍賦

石臼深深長綠芸土人猶說魏元君金銀氣逼清宵見
雞犬聲疑白晝聞九轉誰磨新歲月六丁長護舊烟雲
盤中李愿幽棲近日讀黃庭幾卷文

送汪希顏僉事改仕湖廣

昭代重提刑移官及壯齡楚人知約法漢吏本通經入
境多供帳分司獨坐廳洗冤公素志民頌幾時聽

楚楚越公孫江南舊業存凌秋趨憲府戒曉出京門關
道喧人語河橋落漲痕臨岐珍重意公恕答君恩

箕墩文集卷六十五